



KABINET DIREKTORA

Broj: 01- 18- 4151-06/05
Datum: 03.08.2005. godine

Na osnovu člana 7. stav 1. i 2. i člana 8. stav 1. Zakona o sistemu indirektnog oporezivanja u Bosni i Hercegovini ("Službeni glasnik BiH", broj 44/03 i 52/04) i člana 61. stav 2. Zakona o upravi ("Službeni glasnik BiH", broj 32/02), direktor Uprave za indirektno oporezivanje d o n o s i

U P U T S T V O
O PRIVREMENOM UVOZU I IZVOZU AMBALAŽE I PALETA

I OSNOVNE ODREDBE

Član 1.
(Predmet)

Ovim uputstvom bliže se propisuje provođenje postupka privremenog uvoza i izvoza ambalaže i paleta.

Član 2.
(Definicije)

(1) Ambalažom (pakovanjem) u smislu ovog uputstva smatraju se:

- svi predmeti i materijali koji se koriste ili se mogu koristiti za pakovanje, zaštitu, spremanje i razdvajanje robe u onom obliku u kojem su privremeno uvezeni (izuzev materijala za pakovanje kao što su slama, parir, staklena vuna, piljevina i sl. kada se uvoze na veliko), a označeni su trajnim i neizbrisivim oznakama lica registrovanog izvan carinskog područja BiH ili lica ustanovljenog u BiH i namijenjeni višekratnoj upotrebi i
- druga ambalaža koja nije obilježena trajnim neizbrisivim oznakama lica ustanovljenog izvan carinskog područja BiH ili lica ustanovljenog u BiH, a namijenjena je višekratnoj upotrebi.

(2) Pojam ambalaže iz stava (1) ovog člana ne obuhvata kontejnere koji su regulisani odredbama člana 354. Odluke o provedbenim propisima Zakona o carinskoj politici BiH ("Sl. glasnik BiH", broj 63a/04, u daljem tekstu: Odluka).

(3) Paletâ u smislu ovog uputstva, označava napravu na platformi na koju se može smjestiti određena količina robe i tako čine jedinstven teret u prevozu, rukovanju ili slaganju primjenom mehaničkih sprava. Ta naprava je izrađena samo od dvije površine odvojene nosačima, ili pak od samo jedne površine koja stoji na nogarima, visina je smanjena koliko je moguće da ipak dopusti pomicanje viljuškarima ili ručnim viljuškarima, a može ili ne mora imati nadgradnju.

U slučaju kada se roba uvozi/izvozi na paletama koje nisu namijenjene ponovnom izvozu/uvozu, iste se ne stavljaju u postupak privremenog uvoza/izvoza, nego one u carinskom postupku dijele sudbinu robe.

II PRIVREMENI UVOZ I PONOVI IZVOZ AMBALAŽE

Član 3.

(Uslovi za privremeni uvoz ambalaže)

Privremeni uvoz ambalaže, u skladu sa članom 368. Odluke, odobrava se uz potpuno oslobođanje od plaćanja uvoznih pristojbi, ako se:

- ambalaža privremeno uvozi puna, te se ponovo izvozi prazna ili puna,
- privremeno uvozi prazna, a ponovo se izvozi puna.

Član 4.

(Ograničenje upotrebe u unutrašnjem prometu)

Ambalaža se ne smije upotrebljavati u unutrašnjem prometu, osim za predviđeni ponovni izvoz. Ako se ambalaža privremeno uvozi puna, navedeno ograničenje vrijedi od trenutka kada se ambalaža isprazni.

Član 5.

(Postupak kod privremenog uvoza ambalaže)

(1) U skladu sa članom 136. i članom 300. stav 3. drugi podstav Odluke, ambalaža iz člana 2. stav 1. ovog uputstva, bilo da je prazna ili puna, prijavljuje se za postupak privremenog uvoza kod ulaznog graničnog carinskog ureda usmenim putem, uz predočavanje, u dva primjerka, pravilno popunjenog Obrasca o privremenom uvozu ambalaže (dalje: Obrazac). Obrazac sadrži podatke propisane članom 302. stav 2. Odluke, a dat je u prilogu ovog uputstva i čini njegov sastavni dio.

(2) Ovlašteni carinski službenik u ulaznom graničnom carinskom uredu sravnjuje podatke iz podnijetog Obrasca sa stanjem ambalaže i na oba primjerka (u rubrici 11a.) stavlja naznaku: "privremeni uvoz" i datum, što ovjerava svojim potpisom (uz navođenje službene šifre) i službenim pečatom.

(3) Nakon ovjere službenik jedan primjerak Obrasca zadržava za službenu evidenciju i odlaže ga u poseban registrator po redoslijedu datuma ovjere, a drugi vraća deklarantu. U tom slučaju usmena prijava se smatra zahtjevom, a ovjera Obrasca odobrenjem za privremeni uvoz ambalaže.

(4) Ako se *privremeno uvozi puna ambalaža* tada ulazni granični carinski ured, neovisno od postupka privremenog uvoza za ambalažu, za robu provodi propisani postupak provoza.

U zahtijevanom carinskom postupku nad robom, u slučajevima gdje je to potrebno, deklarant može, kod nadležne carinske ispostave, dokazivati da je ambalaža u kojoj se roba prevozi stavljena u postupak privremenog uvoza pokazivanjem Obrasca koji mu je vratio ulazni granični carinski ured (ili prilaganjem njegove kopije uz carinsku prijavu).

Član 6.

(Postupak kod ponovnog izvoza privremeno uvezene ambalaže)

(1) U skladu sa članom 136. stav 2. Odluke, ponovni izvoz privremeno uvezene ambalaže, deklarant usmeno prijavljuje kod izlaznog graničnog carinskog ureda, uz podnošenje dvije kopije Obrasca ovjerenog od službenika ulaznog graničnog carinskog ureda.

(2) Ako se postupak privremenog uvoza ambalaže, po jednom Obrascu iz stava (1) ovog člana, razdužuje u više puta, kod svakog ponovnog izvoza kojim se razdužuje taj postupak, kod izlaznog graničnog carinskog ureda podnose se dvije kopije tog Obrasca u kojem se moraju naznačiti vrsta i količina ambalaže koja se ponovo izvozi.

(3) Ovlašteni carinski službenik u izlaznom graničnom carinskom uredu svrnuje podatke iz podnijete kopije Obrasca sa stanjem ambalaže (identifikacija vrste i količine koja se razdužuje) i na obe kopije (u rubrici 11b.) stavlja naznaku: "ponovni izvoz", podatke o ambalaži koja se ponovi izvozi i datum, što ovjerava svojim potpisom (uz navođenje službene šifre) i službenim pečatom. Nakon toga jednu kopiju Obrasca zadržava za službenu evidenciju i odlaže je uz original Obrazac na koji se odnosi, a koji je zadržan u evidenciji prilikom privremenog uvoza ako je i (ili u poseban registrator po redoslijedu datuma ovjere, ako izlazni ured nije i ulazni po tom Obrascu), a drugu kopiju vraća deklarantu.

(4) Zadržanu kopiju Obrasca izlazni granični carinski ured, ako i sam nije ulazni ured, putem faksa ili na drugi pogodan način, dostavlja ulaznom carinskom graničnom uredu iz člana 5. ovog uputstva. Taj ured primljenu kopiju Obrasca ovjerenu od izlaznog ureda, odlaže uz primjerak tog Obrasca koji se nalazi u njegovoj evidenciji pomenutoj u stavu 3. člana 5. ovog uputstva, radi praćenja roka privremenog uvoza ambalaže i njenog razduženja.

(5) Ako se *ponovno izvozi puna ambalaža*, tada izlazni carinski granični ured, neovisno od postupka ponovnog izvoza ambalaže, u pogledu robe koja se izvozi u svemu postupka kao izlazni carinski ured u postupku izvoza s hodno članu 396. Odluke.

Član 7.
(Obaveze deklaranta)

(1) Deklarant je obavezan voditi evidenciju o postupku privremenog uvoza ambalaže i razduženju tog postupka i staviti je na raspolaganje carinskim organima radi kontrole.

(2) Deklarant je u obavezi pratiti rokove privremenog uvoza ambalaže i u tom roku istu razdužiti ponovnim izvozom ili određivanjem ambalaži drugog carinski odobrenog postupanja ili upotrebe. U protivnom, nadležni carinski organi će preduzeti propisane mjere i radnje radi reguliranja situacije u vezi sa ambalažom i naplate eventualnog carinskog duga.

III PRIVREMENI IZVOZ I PONOVI UVOZ AMBALAŽE

Članak 8.
(Privremeni izvoz i ponovni uvoz ambalaže)

(1) Sukladno članku 190. i 196. Odluke, odredbe članka 5. ove upute odgovarajuće se primjenjuju i na postupak privremenog izvoza ambalaže koja, u smislu članka 4. točka (12) Zakona o carinskoj politici BiH ("Sl. glasnik BiH", broj 57/04), ima carinski status bh. robe (domaća ambalaža), a odredbe članka 6., ako se privremeno izvezena ambalaža ponovno uvozi u carinsko područje BiH.

(2) U slučaju iz stavka (1) ovoga članka Obrazac ovjeren od izlaznog graničnog carinskog ureda služi kao dokaz istupa robe iz carinskog područja BiH na isti način kao i primjerak 3 izvozne carinske prijave.

(3) Obrazac iz stavka (2) ovoga članka je, u smislu članka 184. i 190. Odluke, pojednostavljena prijava u pisanom obliku, u kom slučaju nije potrebno podnošenje dodatne carinske prijave.

IV PRIVREMENI UVOZ I IZVOZ PALETA

Članak 9.
(Privremeni uvoz paleta)

(1) Privremeni uvoz paleta, sukladno članku 353. Odluke, odobrava se uz potpuno oslobođanje od plaćanja uvoznih pristojbi.

(2) U postupak privremenog uvoza mogu se staviti palete koje se privremeno uvoze u vezi sa komercijalnom operacijom, pri čemu palete same po sebi nisu predmet prodaje ili kupovine, već se privremeno uvoze radi pakovanja ili prevoza komercijalne robe i namijenjene su ponovnom izvozu.

(3) Sukladno članku 136. stavak 1. točka (b) Odluke, carinska prijava za privremeni uvoz paleta podnosi se usmeno ulaznom graničnom carinskom uredu.

Ako palete nisu prijavljene usmeno, carinskom prijavom za privremeni uvoz paleta, u smislu članka 140. stavak 1. točka (b) Odluke, smatra se i sam čin prelaska granice carinskog područja BiH.

Članak 10.

(Ponovni izvoz privremeno uvezenih paleta)

(1) Sukladno članku 136. stavak 2. Odluke, palete se prijavljuju za ponovni izvoz usmeno izlaznom graničnom carinskom uredu.

Ako palete nisu prijavljene usmeno, carinskom prijavom za ponovni izvoz paleta, u smislu članka 140. stavak 1. točka (b) Odluke, smatra se i sam čin prelaska granice carinskog područja BiH.

(2) Postupak privremenog uvoza paleta se razdužuje i kada se palete iste vrste i u osnovi iste vrijednosti izvoze ili ponovo izvoze u roku od 24 mjeseca, od dana stavljanja u postupak privremenog uvoza. Broj paleta privremeno uvezenih tokom roka 24 mjeseca mora odgovarati broju paleta izvezenih ili ponovno izvezenih tokom istog perioda. Uvozne i izvozne palete moraju biti istovrsne i u osnovi iste vrijednosti (načelo kompenziranja jednakim brojem paleta).

Član 11.

(Privremeni izvoz i ponovni uvoz paleta)

Odredbe člana 9. ovog uputstva odgovarajuće se primjenjuju i na postupak privremenog izvoza domaćih paleta, a odredbe člana 10. ako se privremeno izvezene palete ponovno uvoze u carinsko područje BiH.

V ZAJENIČKE ODREDBE ZA NASLOV II I IV

Član 12.

(Rokovi i obezbjeđenje carinskog duga)

(1) Postupak privremenog uvoza ambalaže i paleta može se, shodno članu 136. stav 2. Zakona o carinskoj politici BiH i članu 350. stav 2. Odluke, odobriti za najduže 24 mjeseca.

(2) Za privremeni uvoz ambalaže i paleta ne podnosi se obezbjeđenje za pokriće eventualnog carinskog duga.

VI PRIJELAZNE I ZAVRŠNE ODREDBE

Član 13.

(Stavljanje van primjene, stupanje na snagu i objava)

(1) Stupanjem na snagu ovog uputstva prestaju se primjenjivati sva akta bivših carinskih uprava entiteta BiH kojima su bila regulirana pitanja koja su predmet ovog uputstva.

(2) Ovo uputstvo stupa na snagu narednog dana od dana donošenja.

(3) Ovo uputstvo objavit će se na Web stranici Uprave za indirektno oporezivanje.

**DIREKTOR
KEMAL ČAUŠEVIĆ**

Dostaviti:

1. Kabinet direktora
2. Regionalnim centrima-Odsjeku za carine
3. Sektorima i Odjeljenjima u Središnjem uredu UIO
4. EU CAFAO
5. a/a.

OBRAZAC ZA PRIVREMENI UVOZ/IZVOZ AMBALAŽE

Prilog usmenoj carinskoj prijavi

PRIVREMENI UVOZ/IZVOZ ¹			
1. Podnosilac zahtjeva za odobrenje (ime/naziv, adresa, I.B.):			
2. Karakter upotrebe/korištenja:			
3. Član Odluke (zakonski osnov zahtjeva):			
4. Istovjetnost robe (opis robe i druga sredstva za njenu identifikaciju):			
5. Privremeno uvezena ambalaža:			
Red.broj	Trgovački naziv i oznake ambalaže	Tarifna oznaka robe	Količina

Vrijednost u KM				
6. Carinski organ završetka postupka:			7. Rok za završetak postupka:	
8. Mjesto upotrebe robe:				
9. Premještanje robe (gdje to odgovara):				
10. Mjesto i datum:			Pečat poduzeća:	
Potpis odgovornog lica:				
11. OVJERA OD CARINSKOG ORGANA				
11a. Kod ulaska u postupak privremenog uvoza/izvoza		11b. Kod ponovnog izvoza/uvoza		
Postupak ¹ :		Postupak ² :		
Datum:		Vrsta i količina ambalaže ³ :		
Potpis i sl.šifra:		Datum:		
M.P.		Potpis i sl.šifra:		
		M.P.		

- " 1 " - navesti privremeni uvoz ili privremeni izvoz, u zavisnosti koji je postupak u pitanju
- " 2 " - navesti ponovni izvoz ili ponovni uvoz, u zavisnosti koji postupak je u pitanju
- " 3 " - ako je odjednom (po jednom obrascu) privremeno uvezena/izvezna ambalaža koja se razdužuje u više navrata, tada treba navesti, odvojeno kosim crtama, redni broj pod kojim je ambalaža koja se razdužuje zavedena u rubrici 5 obrasca i njenu količinu koja se razdužuje ponovnim izvozom/uvozom.